

Na osnovu člana 8. stav 3. alineja 1. Zakona o principima lokalne samouprave („Službene novine Federacije Bosne i Hercegovine“, broj 49/06. i 51/09.) i člana 95. i 100. Poslovnika Gradskog vijeća Tuzla („Službeni glasnik Grada Tuzla“, broj 7/17, 2/18, 8/19, 3/20 i 7/20 i 2/21) i u skladu sa Protokolom o postupanju u slučajevima nasilja za Općinu Tuzla broj: 02-35-5570-2014, Gradsko vijeće Tuzla, na sjednici od 25. februara 2021. godine, donosi:

REZOLUCIJU

o sprečavanju uznemiravanja i seksualnog nasilja nad ženama

I

Polazeći od Univerzalne deklaracije o ljudskim pravima i Konvencije o sprečavanju i borbi protiv nasilja nad ženama i nasilja u porodici (Istanbulska konvencija), kojima se zabranjuje svaka vrsta nehumanog postupanja, uključujući i nasilje nad ženama i obitelji, pozivajući se na odredbe Ustava Bosne i Hercegovine, Zakona o zabrani diskriminacije, Zakona o ravnopravnosti spolova, Krivičnog zakona BiH; Ustava Federacije Bosne i Hercegovine; Krivičnog zakona FBiH; Zakona o zaštiti od nasilja u porodici FBiH, Zakona o radu FBiH i Ustava Tuzlanskog Kantona, Gradsko vijeće Tuzla, oštro osuđuje svaki oblik nasilja i diskriminacije nad ženama, uključujući i uznemiravanja i seksualnog nasilja nad ženama.

II

Svjesni da je uznemiravanje i seksualno nasilje nad ženama prisutno u svim zajednicama svijeta i da uključuje žrtve i počinitelje svih dobi, obrazovanja, i položaja u društvu i da nasilje ostavlja fizičke i psihičke posljedice, narušava opšte zdravlje žena i djevojčica, uključujući njihovo reproduktivno i spolno zdravlje, kao i da je seksualno nasilje i uznemiravanje manje prepoznato ili povezano sa idejama i načinima ponašanja koji se temelje na stereotipima u našem društvu;

Upoznati sa činjenicom da postoje određeni mehanizmi za zaštitu žrtava seksualnog nasilja i uznemiravanja kao i određene vrste medicinske zaštite i psihološke podrške, ali se isti ne koriste dovoljno;

Svjesni da se žrtve seksualnog nasilja ne obraćaju za pomoć i ne prijavljuju seksualno nasilje i uznemiravanje, zbog straha, prijetnji od počinitelja, osude društva, nerazumijevanja i stigme od strane sistema zaštite i drugih individualnih razloga.

Prepoznavajući trend velikog broja pritužbi putem društvenih mreža na Internetu;

Konstatujući da rodno uvjetovano nasilje češće vrše muškarci nad ženama, čime se odražavaju i jačaju nejednakosti između muškaraca i žena te se ugrožava zdravlje, dostojanstvo, sigurnost žrtava;

Gradsko vijeće Tuzle je posvećeno cilju da se putem ove Rezolucije osigura rodno osjetljivu pomoć i podršku svih nadležnih institucija žrtvama verbalnog, neverbalnog ili fizičkog nasilja i uznemiravanja seksualne prirode, kojim se želi povrijediti dostojanstvo osobe, naročito kad to ponašanje stvara zaštrasujuće, neprijateljsko,

degradirajuće, ponižavajuće ili uvredljivo okruženje, a kako bi podigli opću svijest o ovom problemu u našem društvu, pomogli potencijalnim žrtvama da prepoznaju navedene oblike seksualnog nasilja i uznemiravanja, te ohrabрили žrtve da prijave sve oblike seksualnog nasilja i uznemiravanja.

III

U cilju realizacije svrhe ove Rezolucije, tražimo od nadležnih organa i institucija u Bosni i Hercegovini:

donošenje i usvajanje strategije i akcionih planova za borbu protiv svih oblika nasilja nad ženama i djevojčicama;

donošenje novog akcionog plana rodne ravnopravnosti Grada Tuzla;

provođenje edukacije žena i muškaraca o rodnoj ravnopravnosti i potrebi sprečavanja nasilja i diskriminacije, kao i o potrebi poštovanja fizičkog i psihološkog integriteta žena, kako bi se pomoglo u sprječavanju takvog nasilja;

pokretanje kampanje za podizanje svijesti (uključujući kampanje posebno usmjerene na muškarce) uz savjetovanje i po potrebi u suradnji sa organizacijama civilnog društva i medijima;

promocija besplatne telefonske linije za pomoć za područje Tuzlanskog kantona sa specijaliziranim osobljem (SOS 1265);

nastavak kontinuiteta pružanja finansijske podrške organizacijama civilnog za programe suzbijanje nasilja nad ženama i sprječavanje rodno uvjetovanog nasilja nad ženama i djevojčicama

donošenje etičkih kodeksa u svim javnim preduzećima, ustanovama, zavodima i fondovima kojima je osnivač Grad Tuzla ili koji su u većinskom vlasništvu Grada Tuzle;

utvrđivanje obaveznog godišnjeg izvještavanja o poštovanju obaveza propisanih Zakonom o ravnopravnosti spolova („Službeni glasnik BiH" brojevi:16/03 i 102/09) u sklopu godišnjih izvještaja o radu svih javnih preduzeća, ustanova, kojima je osnivač Grad Tuzla ili koji su u većinskom vlasništvu Grada Tuzla i organa;

IV

Rezoluciju objaviti u “Službenom glasniku Grada Tuzla” na web stranici grada i u sredstvima javnog informisanja.

Grad Tuzla

Gradsko vijeće

Broj: 01/04-A-2915-2021

Tuzla., 25. 02. 2021. godine

PREDSJEDAVAJUĆI

Nataša Perić, prof.

Obrazloženje

Pravni osnov za donošenje Rezolucije

Pravni osnov za donošenje Rezolucije je član 8. stav 3. alineja 1. Zakona o principima lokalne samouprave („Službene novine Federacije Bosne i Hercegovine“, broj 49/06. i 51/09.) i člana 95. i 100. Poslovnika Gradskog vijeća Tuzla („Službeni glasnik Grada Tuzla“, broj 7/17, 2/18, 8/19, 3/20 i 7/20 i 2/21).

Odredbom člana 8. stav 3. alineja 1. Zakona o principima, kojim je propisano slijedeće:

“U vlastite nadležnosti jedinice lokalne samouprave posebno spadaju: -osiguranje i zaštita ljudskih prava i osnovnih sloboda u skladu sa Ustavom”;

Odredbom člana člana 95. Poslovnika Gradskog vijeća Tuzla, propisano je slijedeće:

„Gradsko vijeće donosi odluke, planove, programe, budžet i završni račun Grada Tuzla, rezolucije, naredbe, rješenja, uputstva, zaključke, preporuke i smjernice“.

Odredbom člana člana 100. Poslovnika Gradskog vijeća Tuzla, propisano je slijedeće:

„Rezolucijom, Gradsko vijeće ukazuje na stanje probleme i potrebe u određenoj oblasti društvenog života, utvrđuje politiku koju treba sprovesti u tim oblastima, kao i mjere za njeno sprovođenje.

Rezolucija sadrži i smjernice za rad službi, organa i organizacija, a u vezi s pitanjima na koje se ona odnosi“.

Razlozi za donošenje Rezolucije

Na sjednici drugoj redovnoj Kolegija Gradskog vijeća, održanoj dana 17.2.2021. godine, donesen je slijedeći zaključak:

„Kolegij Gradskog vijeća Tuzla prihvata vijećničku inicijativu vijećnika Senada Mehmedinovića, da Gradsko vijeće Tuzla donese Rezoluciju o sprečavanju seksualnog uznemiravanja i nasilja i traži od Stručne službe Gradskog vijeća Tuzla, da najkasnije do vanredne sjednice pripremi i članovima Kolegija Gradskog vijeća Tuzla, putem e-maila, dostavi tekst rezolucije, nakon čega će Kolegij Gradskog vijeća predložiti Gradskom vijeću Tuzla, da se u dnevni red 3. redovne sjednice Gradskog vijeća Tuzla, uvrsti tačka pod nazivom „DONOŠENJE REZOLUCIJE O SPREČAVANJU SEKSUALNOG UZNEMIRAVANJA I NASILJA“.

Uz pisanu inicijativu vijećnika Pokreta demokratske akcije u Gradskom vijeću Tuzla, dostavljen je i prijedlog teksta Rezolucije.

Napominjemo, da je u Gradu Tuzla na snazi Protokol o postupanju u slučajevima nasilja iz 2014. Godine (Protokol broj: 02-35-5570-2014) čijoj implementaciji aktivno sudjeluju JU Centar za socijalni rad Tuzla i Udruženje “Vive žene” Tuzla a koje finansira Grad Tuzla, zatraženo je od navedenih subjekata da daju svoje sugestije na ponuđeni prijedlog. Značajno je napomenuti ovaj segment jer Grad Tuzla već dugi niz godina učestvuje u prevenciji i zaštiti od bilo kog oblika seksualnog i drugog nasilja.

Nakon konsultacija sa JU Centar za socijalni rad Tuzla i Udruženje “Vive žene” Tuzla, pripremljen je prijedlog, koji se dostavlja Kolegiju Gradskog vijeća Tuzla u daljnju procedure.

PREDLAGAČ:
Kolegij Gradskog vijeća